

Hildebrant mit zorne zuo Kriemhilde spranc, 22
 er sluoc der küneginne einen swæren swertes swanc.
 jā tet ir diu sorge von Hildebrande wê.
 waz mohte si gehelfen, daz si sô grœzlichen scrê?

Dô was gelegen aller dâ der veigen lip. 23
 ze stücken was gehouwen dô daz edele wip.
 Dietrich und Etzel weinen dô began:
 si klageten innecliche beidiu mâge unde man.

Diu vil michel êre was dâ gelegen tôt. 24
 die liute heten alle jâmer unde nôt.
 mit leide was verendet des küniges hohgezît,
 als ie diu liebe leide z'aller jungeste git.

I'ne kan in niht bescheiden, waz sider dâ geschach: 25
 wan ritter unde vrouwen weinen man dâ sach,
 dar zuo die edeln knehte, ir lieben friunde tôt.
 hie hât daz mære ein ende: daz ist der Nibelunge nôt.

Aus d. XXXVII. (Str. 2158—69) und XXXIX. Av. (Str. 2367—79).
 Bartsch, Nibelungenlied.

